

宋史新編卷十四

明南京戶部主事黃由國維輯

度宗

度宗端文明武景孝皇帝諱禕理宗母弟嗣榮王與芮之子也母夫人錢氏所生母夫人黃氏嘉熙四年四月九日生帝于紹興榮邸資識內慧七歲始言言必合度理宗晚無子屬意託神器焉淳祐中賜名孟啓歷授慶遠軍節度使封益國公後又改名孜封建安郡王寶祐元年立爲皇子改今名授崇慶軍節度使開府儀同三司封永嘉郡王二年十月進封忠王十一月加元服字

邦壽五年授鎮南遂安軍節度使景定元年六月立爲
皇太子賜字長源時理宗家教甚嚴雞初鳴問安再鳴
回宮三鳴往會議所參決庶事退入講堂講經史終日
手不釋卷將晡復入起居率爲常理宗問今日講何經
答之是則賜坐賜茶否則爲之反覆剖析又不通則繼
以怒明日須更覆講五年十月丁卯理宗崩受遺詔卽
皇帝位戊辰尊皇后謝氏曰皇太后以生日爲壽崇節
辛未大赦十一月詔曰京師諸夏根本民氣宜紓先帝
龍諸行厚之使勿困也帥漕兩司合蠲近例歲貢以補
助其乏缺所當繼志以副先帝培護根本之意又詔求

直言又詔躬行三年喪加嗣榮王與芮武康寧江軍節
度使依前太師判宗正事臺臣劾宦官李忠輔何舜卿
等竝竄遠方以葉夢鼎參知政事姚希得同知樞密院
事十二月壬寅戒賊吏絕貢羨餘甲辰詔以生日爲乾
會節初開經筵名講殿曰熙明禮部尚書馬廷鸞進讀
大學衍義序陳心法之要是歲兩浙江東西湖南北廣
東西福建成都京西潼川夔利路戶五百六十九萬六
千九百八十九口一千三百二萬六千五百三十二
咸淳元年春正月辛未朔日有食之二月丁未以姚希
得參知政事江萬里同知樞密院事庚申置籍中書記

諫官御史言事歲終以考成績壬戌以王燾簽書樞密院事三月甲申攢理宗于永穆陵夏四月戊午賈似道特授太師閏五月丁未以江萬里參知政事王燾同知樞密院事馬廷鸞簽書樞密院事秋八月蒙古將阿木帥兵至廬州及安慶諸路統制范勝統領張林正將高興副將孟興逆戰死之冬十一月辛丑以留夢炎簽書樞密院事

二年春正月癸丑江萬里罷知潭州二月辛卯詔左右史循舊制立侍御坐前夏四月壬午姚希得罷提舉洞霄宮丁亥王燾罷五月甲寅以王燾參知政事留夢炎

同知樞密院事包恢簽書樞密院事秋七月壬寅罷重
子科是歲安南來貢

三年春正月己丑朔郊大赦丁酉上皇太后尊號壬辰
以王燾知樞密院事葉夢鼎參知政事常挺簽書樞密
院事癸卯立全氏爲皇后戊申帝詣太學謁孔子以顏
淵曾參孔伋孟軻配享顓孫師升十哲邵雍司馬光升
列從祀雍封新安伯禮部尚書陳宗禮國子祭酒陳宜
中進讀中庸明日執經官弁各學官俱進秩諸生推恩
有差二月己未復廣安軍乙丑詔賈似道太師平章軍
國重事三日一朝治事都堂三月壬辰以程元鳳爲右

丞相兼樞密使尋罷夏五月丁亥朔日有食之戊申詔
曰比嘗命有司按月給百官奉惟官愈卑去民愈親仍
聞過期弗予是吏奉吾命不虔也諸路監司其嚴糾劾
六月壬戌以馬光祖參知政事己卯王爚罷知慶元府
秋八月壬戌邊報警急詔諭呂文德等申嚴防遏乙丑
嗣榮王與芮進封福王主榮王祀事辛未以葉夢鼎爲
右丞相兼樞密使留夢炎知樞密院事冬十月庚申復
開州十一月以常挺參知政事馬廷鸞同知樞密院事
四年春正月乙巳留夢炎罷知潭州庚戌詔曰邇年近
臣無謂引去以爲高勉留再三弗近益遠往往相尚不

知其非義也亦由一二大臣嘗勇去以爲衆望相踵至
今孟子於齊王不遇故去是未嘗有君臣之情也然猶
三宿出晝庶幾改之儒者家法無亦取此乎朕於諸賢
允謂無負其弗高尚使人疑於負朕秋九月癸未蒙古
梁白河城始圍襄樊冬十月戊寅朔日有食之參知政
事常挺罷尋卒十二月丙戌包恢罷

五年春正月癸亥葉夢鼎罷判福州以馬廷鸞參知政
事甲戌以江萬里參知政事三月丙午蒙古將阿朮及
宋叛將劉整自白河以兵圍樊城乙卯蒙古城鹿門已
未詔浙西六郡公田設官督租有差辛酉京湖都統張

世傑率馬步舟師援襄樊與蒙古戰于赤灘圃敗之戊辰以江萬里爲左丞相馬廷鸞爲右丞相並兼樞密使馬光祖知樞密院事夏四月高郵縣夏世賢七世義居詔署其門五月巳酉馬光祖罷提舉洞霄宮秋九月辛酉大饗明堂大赦丙寅加上皇太后尊號冬十二月戊子蒙古築南新城

六年春正月壬寅以李庭芝爲京湖安撫制置使督師援襄樊辛酉班成天曆丙寅以陳宗禮簽書樞密院事趙順孫同簽書樞密院事丁卯帝製字民牧民二訓以戒百官戊辰江萬里罷知福州三月庚子朔日有食之

癸丑詔曰吏以廉稱自古有之今絕不聞豈不自意
而墮於上聞歟其令侍從卿監郎官各舉廉吏將顯擢
焉夏四月戊寅以文天祥兼崇政殿說書六月庚午詔
太極圖說西銘易傳序春秋傳序天下士子宜肄其文
秋七月復開州八月甲申樂清縣嘉禾生詔薦士增四
名癸巳詔賈似道十日一朝冬十月丁丑遣殿前副都
指揮使范文虎總師援襄樊十一月乙未陳宗禮罷尋
卒十二月己亥蒙古築萬山城是歲台安吉二州嘉興
華亭二縣並水災振之

七年夏六月己未蒙古會兵圍襄陽秋八月壬辰朔日

有食之冬十月癸丑從政郎朱鑒孫進羣經要略十二月辛亥以御史陳伯大言科舉置士籍戊午詔舉廉能材堪縣令者是冬蒙古改國號曰元是歲紹興平江府安慶無爲吉和鎮巢諸州饑振之

八年春正月庚申詔曰朕惟崇儉必自宮禁始自今宮禁敢以珠翠銷金爲首飾服用必罰無貸臣庶之家咸宜體悉工匠犯者如景祐制必從重典又詔有虞之世三載考績三考黜陟幽明漢之爲吏者長子孫則其遺意也比年吏習媮薄人懷一切計日待遷事未克究又鑒而之他吏胥狎玩竊弄官政吾民奚賴焉繼自今內

之郎曹外之牧守以上更不數易其有治狀昭著自宜
獎異夏五月李庭芝遣部轄張順張貴將兵援襄陽兵
敗二將先後死之六月丙申貶資政殿大學士皮龍榮
衡州安置道卒丁酉以章鑑同簽書樞密院事秋八月
丙戌朔日有食之九月辛未大饗明堂大赦是日賈似
道憾帶御器械胡顯祖輒去位詔罷顯祖出其妹貴嬪
爲尼似道始還冬十一月乙卯馬廷鸞罷知饒州尋予
祠十二月甲寅以葉夢鼎爲右丞相兼樞密使是歲臨
安大雨水紹興六邑水振之

九年春正月乙丑阿朮劉整陷樊城守將范天順牛富

死之二月庚戌呂文煥以襄陽府降于元三月壬午詔
建機速房于中書以革樞密院漏泄稽違之弊夏四月
癸巳詔曰迺者邊吏弗戒致有襄難將士頻歲暴露邊
民蕩析離居盡傷朕心爾閫臣專征方面宜身率諸將
宣揚國威以賞戮用命不用命爾守臣有土有民宜申
儆國人保固封守爾諸將尚迪果毅一乃心力各以其
兵敵王所愾今朕多誥爾其悉聽明訓毋懈毋悞習于
故常功多有厚賞爾不克用勸罰固不得私也又如中
外小大臣僚有材識超卓明控御之宜懷攻守之略者
密具以聞一如端拱二年制書朕當虚心以聽五月庚

辰詔諸人上書請以丞相似道督兵者不允餘付機速
房六月己丑給事中陳宜中請正范文虎不力援襄之
罰賈似道庇之只降一官癸卯京湖制置使汪立信言
襄樊之禍皆由范文虎及俞興父子興子大忠坐貶循
州拘管閏月丙辰朝散郎師顯行進注皇朝文鑑秋七
月癸巳復洋州戊戌復馬騶山九月辛巳以章鑑簽書
樞密院事陳宜中同簽書樞密院事冬十一月壬午子
熹授左衛上將軍封嘉國公是月以陳奕爲沿江制置
使夏貴爲淮西制置使李庭芝爲淮東制置使兼淮西
策應使

十年春正月賈似道母死詔以鹵簿葬之似道起復視事二月巳酉趙順孫罷爲福建安撫使夏四月乙卯子曷授左衛上將軍進封永國公五月壬寅張珏表請城馬駿虎頭山或先築其一以據險要六月元主諭諸將率兵南伐且數賈似道負約執郝經之罪命水陸竝進秋七月癸未帝崩在位十一年年三十五遺詔太子熈卽皇帝位八月上尊謚廟號度宗

論曰理宗季年蒙古亟陷我疆圉蓋權臣賈似道寔啓之釁度宗昏弱復拱手聽其所爲故政愈禁而敵愈迫潰敗之勢岌岌然不可支持譬如病者始終付於庸醫

至沈劇而莫悟也哀哉

帝熹

帝熹度宗子也母皇后全氏咸淳六年九月己丑生帝于大內九年授左衛上將軍封嘉國公十年七月癸未度宗崩奉遺詔卽皇帝位年四歲謝太后臨朝稱制甲申兄昰進封吉王弟昺進封信王賈似道依文彥博故事獨班起居丙戌上皇太后尊號曰壽和聖福太皇太后皇后曰皇太后又詔以生日爲天瑞節辛卯以朱禩孫爲京湖四川宣撫使八月癸丑大霖雨天目山崩九月癸未元兵大會于襄陽尋分兵一入淮一趨郢一徇

荆南甲午開經筵冬十月丁未饒州布衣董聲應進諸
史纂約兵鑑刑鑑詔充史館編校文字乙卯令州縣行
義田義役丁巳元兵犯郢州張世傑力戰禦之遂去由
藤湖入漢戊午郢州副都統趙文義追戰金子湖死之
乙丑以章鑑同知樞密院事陳宜中簽書樞密院事丙
寅元兵陷沙洋城總管王虎臣與守隘官王大用皆被
執十一月庚辰以陸秀夫爲淮東安撫制置司參議官
丙戌以王爚爲左丞相章鑑爲右丞相竝兼樞密使十
二月癸丑元兵攻陽邏堡夏貴以兵力守都統制王達
出戰死之丙辰元兵復攻陽邏堡都統制劉成以定海

水軍戰死夏貴敗沿江縱兵大掠歸廬州己未知漢陽
軍王儀以城降于元是日呂文煥以元兵攻鄂州都統
程鵬飛提舉張晏然以城降癸亥詔賈似道都督諸路
軍馬以孫虎臣總統諸軍詔天下勤王甲子起李芾爲
湖南提刑乙丑以高達爲湖北制置使詔邊費浩繁吾
民重困貴戚釋道田連阡陌安居暇食有司覈其租稅
收之庚午程鵬飛以元兵徇黃州知州陳奕降是時李
庭芝以兵勤王

德祐元年春正月甲戌陳奕以元兵犯蘄州知州管景
模降壬午欽度宗于宋紹陵乙酉以陳宜中同知樞密